

Cosnan cu ta pone hende cunsumi

Mi a djis pone e titulo aki pasobra tin cosnan cu ta pone hende cunsumi riba e isla aki sin cu por haci nada contra.

Nos a caba di haya por ehemplo **Shanaya Howell**, un hobencita cu dos aña sigui ta conquista **TITULO MUNDIAL di BMX** den campeonato, cu participacion di e mihornan di mundo.

Dia el a bolbe ta solamente president di Staten tabata presente na aeropuerto hunto cu familiarnan pa ricibi e campeon. Despues relato a sali den corant di e campeon mundial aki cu su trofeo, y eyan tur cos a keda.

Cu su 7 aña y cu su 8 aña di edad el a bira campeon mundial den su categoria, algo grandi pa nos isla.

Ni un ministro pa dune un bon bini y pa duna felicitacion. E bondnan deportivo, ASU, y deportistanan a keda ausente.

El a bolbe Aruba, y parce cu tur cos a caba aki. **"Danki pa bo hazaña y awor bay sosega atrobe den buki di olvido te dia cu kizas bo logra atrobe!"** ta locual por bisa cu e pensamento ta.

Shanaya a merece un recorrido rond di Aruba. El a merece un bishita special na **Gobernador**, y na **Conseho di Ministro**. El a merece di tende di **banconan**, of companianan grandi di **cervez** cu ta probecha di deporte, di **Valero** cu tin Aruba y su deportistanan na pecho, di **Lotto pa Deporte** cu tey pa yuda deporte y deportistanan, cu nan a habri siquiera un buki di banco cu un suma riba dje, pa stimule y cu e pr goza di dje den futuro, sea pa estudio o su preparacionnan.

"Ay..., mi a kiboca aki! Comercio awendia no ta duna nada sin haya back mil biaha e balor ey, y e otronan ta pa promocion so nan tey".

Ministerio di Deporte cu mester a carga e hoben aki, te awe a keda mudo, y no solamente pa **Shayana**, pero tambe pa e otro....

E otro ta **Sara Quita Offringa** cu ultimo añanan tin nomber di Aruba rond di mundo menciona den deporte aquatico. **Sara Quita** cu a bira e **Pro Kids Queen 2007 na Bonaire** siman pasa cu windsurfing den e **Regata di Bonaire**, y cu su nomber ta aparece **mundialmente den revistanan** di deporte aquatico.

E tambe a keda na e **"Danki pa bo hazaña y awor bay sosega atrobe den buki di olvido te dia cu kizas bo logra atrobe!"**

Asina nos ta stima nos deportistanan, principalmente nos talentonan hoben cu ta destaca na mundo. Na lugar di pronk cu nan y laga nan sinti cu nan a logra algo grandi pa nan pais, nos ta tira nan un banda y lubida nan, na lugar di pusha nan y stimula nan y laga nan sinti orguyoso di locual nan a logra pa nan pais y nan hendenan.

Nan ta hobennan modelo, hobennan ehemplar cu nos mester usa pa stimula mucha y hubentud.

"Ay mi a kiboca atrobe... No por gana placa cu nan titulo; no tin beneficio comercial pa saca for di e titulo of nan deporte".

Nan no tin organizacion pisa nan tras; nan no tin personahenan pisa nan tras; nan no tin relacionista publico pisa nan tras - relacionista publico cu ta move di un medio pa otro pa roga pa nan nomber keda wordo menciona tur dia pa asina logra un reconocimiento manera hopi cu no a merece esaki si a logra cu e sorto di sosten nan aki.

E RECLAMONAN RIBA HOTELNAN

Ayer a wordo publica un biaha mas reclamo di un hoben Arubano riba e manera cu un hotel ta trata su empleadonan. E biaha aki ei a menciona cu e trato ta **"manera cacho"** nan ta wordo trata.

Nos lesa e reclamonan aki y lubida nan. **E reclamonan aki ta berdad.** Den mundo hotelero riba Boulevard ta hopi di e reclamonan aki tin y ta parce cu no tin un instancia na Aruba pa investiga nan.

"Ay mi a kiboca atrobe... Instancia tin, pero ningun instancia lo no mishi cu hotel. No lubida cu ta nos pilar di economia y nan mag haci y deshaci manera nan kier pasobra gobierno mester di placa di turistanan.

E hoben a reclama e trato, y no mester lubida cu ta Arubano e ta. Esey kiermeen cu e prome oportunidad cu tin, **MESTER** kite di trabao pasobra e tendencia aki no ta cos di awor den e mundo aki.

Instancianan no ta funciona.

Tin hotel cu hendenan cu ta traha den **TOP** cu ta bin Aruba keda como turista, pero ta traha ilegal den hotel y trapa nos hendenan, sali na ora, bolbe despues di algun siman como turista, traha atrobe, y

ningun instancia pa controla.

Tin trahadornan cu ta traha mainta te merdia den cierto departamento; tuma un of dos ora liber y bolbe hotel traha atardi pa anochi den otro departamento of seccion, y tur esaki riba un permiso cu ta pa cierto trabao, y no tin control, y asina tin hopi cos mas. Pero ningun hende ta mishi pasobra **"ta mundo hotelero; ta nos turismo"**.

CORTAMENTO DI CABLE

Di tempo cu cable a bini Aruba mi ta riba e mes oferta di mas barata. Esaki pa motibo cu semper mi tabata contra di sistema cu nos tin. Awor cu e ta den otro man, ta mescos a keda. Como abonado bo no tin nada di bisa tampoco; bo no tin nada di reclama; pasobra ta un monopolio. Si bo no kier cable, bo laga y busca **DISH**. Pero ni e dishnan no por confia pasobra bo no sa ki dia nan ta wordo corta y si nan ta legal mes of si nan ta autoriza. Si bo no tin placa pa e dish, bo no por cambia di Cable pa Dish tampoco.

Mi no ta bay paga pa mas canal pa mi mira e canalnan cu normalmente mester ta den e programa basico for di cuminsamento. Pasobra e necesidad tey pa nan, y ta canalnan cu hende kier mira, nan ta pasa pa canalnan pa cual bo mester paga extra. Pero den e basico mes ta yen di canal cu por kita afc. Canal 13 cu 23 ta mescos, tin canal di Cable TV cu bo ta paga pe cu ni si yama pa algo tecnico no ta haya hende; tin canal di ta compra y vende etc. cu ta canal perdi, pero tin cu paga pa nan y asina por sigui.

Nan por corta señal ora cu nan kier bao di tur sorto di pretexto cu bo tin cu acepta y ni maske bo bula riba cay abao bo no por gana nunca. Pero bo tin cu paga si pa e señal cu bo no a haya of canal y shownan cu bo no a mira.

E cobramento tambe ta un dolor. Cuanto keho no ta haya continuamente riba esaki, y ayera mes mi a haya un keho di dje.

Mi semper ta bisa cu si bo tin cu paga tal fecha, bo tin cu paga. Un dia despues mes bo ta den falta y no tin nada di keha. Si bo ta atrasa, bo ta den falta. No ta cable su falta. Ta bo falta pasobra bo no a paga na ora manera mester ta.

Locual si mi ta haya cu no ta bon, ta cu nan ta corta dialuna, y ta bisabo cu **"si bo paga awe, nos ta reconecta aki 3 dia"**. Esey tabata e keho di ayera atrobe.

Cu **Elmar y WEB**, nan ta corta mainta, bo ta paga mainta pa merdia, pero a atardi of anochi bo coneccion tey atrobe. Cu **SETAR**, mes si bo ta atrasa, nan no ta corta mes ora. Nan ta corta bo yamadanan y bo ta keda ricibi. Si bo sigui atrasa ta bini e medida di corta e yamadanan ricibi tambe. Y si bo bay paga, ta mes ora ta reconectabo.

Ta cu cable so bo tin cu wordo **CASTIGA 3** of mas dia largo.

E trahadornan? Mi no por keha riba trahadornan di Cable. Na telefon semper mi a haya nan masha corecto y personalmente semper mi a haya nan masha corecto.

Corecto tambe ta cu Cable ta mandabo un aviso di antemano y despues hasta un di dos aviso. Si no a paga, e falta ta cerca bo y no cerca nan. Bo tin nada di reclama cu nan a corta. Pero di reclama si ta e **3 of mas dia** pa nan conectabo bek.

E ARMANAN Y DROGA HAYA

Por a mira e **SHOW** di e armanan y droga haya na concierto fin di siman. Na San Nicolas e **SHOW** aki a cay den masha mal tera, pasobra e ta aparenta cu **TUR** actividad na San Nicolas lo tin cantidad di droga y arma. Si a haci esaki (pa prome biaha) anto percura pa haci esaki tambe cu **TUR** concierto. Pero menciona tambe di unda nan a bin, esta di unda esnan cu tabata tin e armanan y droga ta bin. E **SHOW** di arma y droga a aparenta cu ta for di hendenan di San Nicolas esakinan a wordo confisca lubidando cu ta for di **henter e isla** tabata tin hende na e concierto aki, y mas hende pafo cu tabata tin paden. Un pabien ta na su lugar pa e control aki, pero haci'e cu **TUR** concierto y duna **SHOW** di esakinan tambe y mihor ainda menciona di unda nan a bin.

Joby Naar